



**Sumáriu Kazu**  
**Tribunál Judisiál Primeira Instánsia Baukau**  
**Maiu 2024**

**Afirmasaun:** Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Judisiál Primeira Instánsia Baukau**

**1. Totál kazu ne'ebé JSMP monitoriza: 20<sup>1</sup>**

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	13
Artigu 154 KP no artigu 2, 3, 35 no 36 (LKVD)	Maus-tratus ba kónjuje	2
Artigu 172 KP no artigu 173 alinea c KP	Violasaun seksuál ho agravasaun	1
Artigu 177 (1) KP	Abuzu seksuál ba menór	1
artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Arma brankas	2
Artigu 261 KP	Uzurpasaun ba imovel	1
<b>Totál</b>		<b>20</b>

**2. Totál desizaun ne'ebé JSMP monitoriza: 13**

Tipu desizaun	Artigu	Númeru
Pena prizaun	Artigu 66 KP	2

<sup>1</sup> Totál kazu 20 ne'e la representa totál kazu ne'ebé Tribunál Judisiál Primeira Instánsia Baukau julga iha fulan Maiu 2024.

Suspensaun ba prizaun nia ezekusaun	Artigu 68 KP	4
Pena multa	Artigu 67 KP	7
<b>Totál</b>		<b>13</b>

**3. Totál kazu sira ne'ebé adia tuir JSMP nia monitorizasaun hamutuk: 5**

**4. Totál kazu ne'ebé sei kontinua prosesu tuir JSMP nia monitorizasaun hamutuk : 2**

**B. Deskrisaun sumáriu julgamentu ba desizaun kazu sira**

**1. Krime ofensa ba integridade fízika simples ho natureza violénsia doméstika**

Nú. Prosesu : 0006/22 VQSIC  
 Kompozisaun Tribunál : Singulár  
 Juisa : Dra. Sribuana da Costa  
 Prokuradór : Dr. Julio da Silva Correia  
 Defeza : Dr. Sidónio Maria Sarmento  
 Desizaun : Pena multa US\$30.00

Iha 06 Maiu 2024, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu JHP hasoru nia feen, iha Munisípiu Vikeke.

**Akuzasaun Prokuradór**

Prokuradór akuza katak iha 01 Juñu 2022, iha oras tuku 18:00 lokraik, arguidu tuku dala rua iha lezada nia kotuk-laran, buti lezada nia kakorok no buti lezada nia liman parte karuk. Antes ne'e, arguidu no lezada diskute malu kona-ba lezada la autoriza arguidu hola fetu seluk.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

**Produsaun ba prova sira**

Iha prosesu julgamentu, arguidu deklara katak la tuku lezada, la buti lezada nia kakorok maibé buti deit lezada nia liman no hanehan lezada nia ulun ba rai depois arguidu halai, kontinua halai atu salva-an tanba lezada kaer hela katana mak buka arguidu.

Alende ne'e, lezada mós konfirma katak iha momentu akontesementu ne'e arguidu tuku dala rua iha lezada nia kotuk-laran, buti lezada nia liman parte karuk, buti lezada nia kakorok no hanehan lezada nia ulun ba rai, lezada deklara liután katak la kaer katana, maibé ho liman mamuk de'it, ba buka arguidu tanba sira nia oan moras hela.

### **Alegasaun finál**

Prokuradór haktuir katak arguidu konfesa parsial maibé ofendida konfirma akuzasaun no konfirma mós relatoriu médiku iha autus, prova katak arguidu halo agresaun hasoru ofendida tuir akuzasaun ne'ebé imputa ba arguidu, tanba ne'e husu ba tribunál atu kondena arguidu ba pena prizaun tinan ida suspende ba tinan ida.

Entretantu, parte defeza haktuir katak mezmú arguidu deklara parsialmente faktu sira maibé arguidu arrepende ninia hahalok, di'ak malu ona ho lezada no foin primeiravés mai hatan iha tribunál, tanba ne'e husu ba tribunál fó pena kmaan ba arguidu.

### **Desizaun**

Depoisde avalia faktu sira hotu, tribunál prova katak arguidu tuku dala rua iha lezada nia kotuk-laran, buti lezada nia kakorok no buti lezada nia liman parte karuk.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu arrepende ninia hahalok, di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumprí pena multa refere.

## **2. Krime ofensa ba integridade fízika simples ho natureza violénsia doméstika**

Nú.Prosesu	: 0025/22 VQWTL
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Julio da Silva Correia
Defeza	: Dr. Sidónio Maria Sarmiento
Desizaun	: Pena multa US\$30.00

Iha 07 Maiu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu AL hasoru nia feen, iha Munisípiu Vikeke.

### **Akuzaun Prokuradór**

Prokuradór akuza katak iha 07 Maiu 2022, iha oras tuku 17:00 lokraik, arguidu tuku dala rua iha lezada nia ulun halo lezada monu tun ba rai, hafoin arguidu lori bee fakar iha lezada nia leten no sama tan lezada nia ain. Antes ne'e, arguidu ho lezada diskute malu kona-ba lezada soe lakon arguidu nia *simcard*.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35 (b) no 36 LKVD.

### **Produsaun ba prova sira**

Iha prosesu julgamentu arguidu konfesa integralmente ba faktu sira hotu iha akuzasaun no deklarasaun katak foin primeiravés mai hatan iha tribunál, promete sei la baku tan lezada iha futuro, depoisde akontisimentu dame malu ona ho lezada no fó osan US\$100.00 ba lezada.

Alende ne'e, lezada mós konfirma ba faktu sira iha akuzasaun no haktuir katak arguidu baku tanba deskonfia lezada mak halo lakon *simcard*, lezada ba halo tratamentu iha postu saúde simu ai-moruk fila ba uma, liu seman rua foin di'ak malu fali, arguidu foin primeiravés baku lezada no depoisde akontesimentu arguidu la baku tan lezada to'o agora.

### **Alegasaun finál**

Prokuradór haktuir katak arguidu konfesa faktu hotu iha akuzasaun no konfirma mós hosi lezada, prokuradór haree katak arguidu nia aktu priense duni ba faktu ne'ebé imputa ba nia, depoisde akontesimentu kontinua moris hamutuk hanesan feen ho la'en nune'e prokuradór husu ba tribunál atu kondena arguidu ba pena prizaun tinan ida suspende ba tinan ida.

Entretantu parte defeza husu pena ne'ebé kmaan ba arguidu tanba arguidu konfesa inetgralmente ba faktu sein rezerva, arrepende ninia hahalok, ofendida mós konfirma depoisde akontese arguidu la baku ona ofendida to'o agora no arguidu mós promete iha futuro sei la baku tan ofendida.

### **Desizaun**

Depoisde avalia faktu sira hotu, tribunál prova katak arguidu tuku dala rua iha ofendida nia ulun halo ofendida monu tun ba rai hafoin, arguidu lori bee fakar iha ofendida nia leten no sama tan lezada nia ain.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

## **3. Krime ofensa ba integridade fízika simples ho natureza violénsia doméstika**

Nú. Prosesu	: 0022/22 VQLLT
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Julio da Silva Correia
Defeza	: Dra. Laura Valente Lay
Desizaun	: Pena multa US\$30.00

Iha 07 Maiu 2024, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu IS hasoru nia feen, iha Munisípiu Vikeke.

### **Akuzaun Prokuradór**

Prokuradór akuza katak iha 15 Dezembru 2022, iha oras tuku 17:00 lokraik, arguidu rasta lezada nia fuuk, tuku dala rua iha ulun, tuku dala rua iha matan-fukun no tuku dala barak iha kanuruk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu arguidu konfesa integralmente ba faktu sira iha akuzasaun no haktuir katak momentu akontesimentu arguidu ho kondisaun lanu mak halo agresan hasoru lezada, kuandu oin mós foin haree lezada nia matan mean no bubu, foin primeiravés baku lezada no ba futuru sei la baku tan lezada.

Alende ne'e, ofendida konfirma ba faktu sira iha akuzaasun no deklarar katak momentu arguidu halo agresan ho kondisaun lanu, ofendida ba halo tratamentu iha sentru saúde simu ai-moruk, liu loron tolu foin ofendida nia moras rekupera fali, depoisde fila hosi polísia di'ak malu kedas ho arguidu, perdua ona arguidu no arguidu foin primeiravés baku ofendida.

### **Alegasaun finál**

Prokuradór haktuir katak arguidu konfesa faktu hotu iha akuzasaun halo agresan tanba ho kondisaun lanu, lezada konfirma katak tuku iha ulun, matan-fukun parte kanuruk, liu loron tolu foin rekopera, nune'e arguidu nia aktu ne'e priense duni violénsia doméstika, tanba ne'e husu ba tribunál atu kondena arguidu ho pena prizaun tinan ida suspende ba tinan ida.

Entretantu parte defeza husu atu aplika pena multa mínimu ba arguidu tanba arguidu konfesa integralmente ba faktu, lezada mós konfirma, agora di'ak malu ona no arguidu promete iha futuru sei la halo tan agresan hasoru lezada.

### **Desizaun**

Depoisde avalia faktu sira hotu, tribunál prova katak arguidu rasta lezada nia fuuk, tuku dala rua iha ulun, tuku dala rua iha matan-fukun no tuku dala barak iha kanuruk.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

## **4. Krime maus-tratus ba kónjuje**

Nú.Prosesu	: 0052/22 VQOSU
Kompozisaun Tribunál	: Koletivu
Juis	: Dr. José António d. Escurial, Dra. Sribuana Costa no Dra. Maria Modesta d. A. Viera

Prokuradór : Dr. Ambrósio Rangel Freitas  
Defeza : Dr. Sidónio Maria Sarmiento  
Desizaun : Pena prizaun tinan 2 supende ba tinan 2

Iha 08 Maiu 2024, Tribunál Judisiál Primeira Instánsia Baukau prezide julgamentu leitura akordaun ba krime maus-tratus ba kónjuje ne'ebé envolve arguidu JA hasoru nia feen, iha Munisípiu Vikeke.

### **Akuzasaun Prokuradór**

Prokuradór akuza katak, iha loron no fulan la apura maibé iha tinan 2020, arguidu tuku dala barak iha lezada nia kotuk-laran no lori ai-sanak baku dala barak iha lezada nia isin-lolon. Loron no fulan la apura maibé iha tinan 2021, arguidu tuku dala ida iha lezada nia kotuk-laran no tebe iha lezada nia ain. Loron no fulan la apura maibé iha tinan 2021, arguidu tuku lezada nia kotuk-laran, liman no lori ai-sanak baku iha lezada nia kotuk laran.

Tuir mai iha 25 Dezembru 2022, iha oras tuku 17:00 lokraik, arguidu tebe dala rua iha lezada nia ain tuur parte loos, tebe dala rua iha ain-kabun parte loos, kaer lezada nia fuuk hodi rasta ba mai, hafoin arguidu buti lezada nia kakorok no kontinua tuku tan dala ida iha kabaas parte loos depois hatete ba lezada katak atu lori katana tetak rahun tiha lezada. Antes agresaun ne'e, arguidu ho lezada diskute malu kona-ba arguidu lanu soe lakon tiha nia *simcard* fila halo agresaun hasoru lezada.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

### **Produsaun ba prova sira**

Iha prosesu julgamentu, arguidu konfesa integralmente katak faktu sira iha akuzasaun ne'e loos hotu, depoisde akontesiemntu di'ak malu ona ho lezada, promete fila ba uma sei la baku tan lezada no foin primeiravés mai hatan iha tribunál.

Alende ne'e, lezada konfirma faktu sira iha akuzasaun no haktuir katak arguidu baku nia kanuruk, oin, buti kakorok, tebe no tuku sisin-lolon, akontese iha 2022 foin lezada halo keixa tanba sente moras bebeik ona mak hatoo keixa.

### **Alegasaun finál**

Prokuradór haktuir katak arguidu konfesa faktu hotu iha akuzasaun, lezada konfirma akuzasaun, arguidu ho lezada idade ferik no katuas la hatudu ezemplu di'ak ba nia família, arguidu arrepende ninia hahalok, foin primeiravés mai hatan iha tribunál, tanba ne'e husu ba tribunál atu kondena arguidu ho pena prizaun tinan rua suspende ba tinan rua.

Entretantu, parte defeza husu pena kmaan ba arguidu tanba arguidu konfesa inetgralmente sein rezerva, primeiravés mai hatan iha tribunál no promete sei la baku tan lezada iha futuro nomós lezada konfirma katak depoisde akonteseimentu di'ak malu ona.

## **Desizaun**

Depoizde avalia faktu sira hotu, tribunál prova katak iha tinan 2020, arguidu tuku dala barak iha lezada nia kotuk-laran no lori ai-sanak baku dala barak iha lezada nia isin-lolon, iha tinan 2021, arguidu tuku dala ida iha lezada nia kotuk-laran no tebe iha lezada nia ain, iha tinan 2021, arguidu tuku lezada nia kotuk-laran, liman no lori ai-sanak baku iha lezada nia kotuk laran, Iha 25 Dezembru 2022, iha oras tuku 17:00 lokraik, arguidu tebe dala rua iha lezada nia ain-uur parte loos, tebe dala rua iha ain-kabun parte loos, kaer lezada nia fuuk hodi rasta ba mai, hafoin arguidu buti lezada nia kakorok no kontinua tuku tan dala ida iha lezada nia kabaas parte loos.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa integralmente, kolabora ho tribunál. nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

## **5. Krime maus-tratus ba kónjuje**

Nú. Prosesu	: 0008/22 VQOSU
Kompozisaun Tribunál	: Koletivu
Juis	: Dr. José António d. Escurial, Dra. Sribuana Costa no Dra. Maria Modesta d. A. Viera
Prokuradór	: Dr. Ambrósio Rangel Freitas
Defeza	: Dra. Laura Valente Lay
Desizaun	: Pena prizaun tinan 3 suspende ba tinan 3

Iha 08 Maiu 2024, Tribunál Judisiál Primeira Instánsia Baukau prezide julgamentu leitura akordaun ba krime maus-tratus ba kónjuje ne'ebé envolve arguidu RS hasoru nia feen, iha Munisípiu Vikeke.

### **Akuzasaun Prokuradór**

Prokuradór akuza katak iha 16 Feveireiru 2022, iha oras tuku 07:00 dadeer, altura ne'ebá lezada moras hela nune'e lezada nia fetu foun mak halo *energen* ba ofendida, maibé derrepente arguidu tolok lezada, nune'e arguidu ho lezada diskuti malu arguidu atu baku lezada, lezada ta'uk taka tiha odamatan, arguidu fila baku rahun tiha sanan rua no kadeira ida.

Loron no fulan la apura maibé iha tinan 2018, arguidu tuku dala barak iha lezada nia kotuk-laran, loron no fulan la apura maibé iha tinan 2019, arguidu tebe dala barak iha lezada nia kotuk-laran no lori ai-sanak baku dala barak iha lezada nia isin-lolon, loron no fulan la apura maibé iha tinan 2020, arguidu tuku dala barak iha lezada nia ulun no basa iha lezada nia hasan, loron no fulan la apura maibé iha tinan 2021, arguidu tuku dala barak iha lezada nia ulun no kotuk-laran.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3 no 35 (b) LKVD.

### **Produsaun ba prova sira**

Iha prosesu julgamento, arguidu deklara katak faktu sira iha akuzasaun loos hotu, depoisde akontese ikus arguidu la baku ona lezada to'o agora, di'ak malu ona ho lezada, arrepende ba ninia hahalok, foin primeiravés mai hatan iha tribunál no arguidu nu'udar agrikultor rezultadu hodi sustenta de'it ba familia.

Alende ne'e, ofendida konfirma ba faktu sira iha akuzasaun no deklara katak dezde moris hamutuk arguidu sempre baku ofendida, akontesimentu iha 2022 ne'e tanba arguidu lori tiha osan US\$ 20.00 ba mate uma no fila mai uma duun fali ofendida mak ba joga karta lakon tiha nune'e mosu diskusaun, arguidu lori alu atu baku ofendida mak ofendida halai tama uma kaer katana mak arguidu baku rahun fali sana no kadeira.

### **Alegasaun finál**

Prokuradór haktuir katak haree ba produsaun prova iha audensia julgamentu, prokuradór intende katak akuzasaun prokuradór prosedente no provadu, arguidu halo tratamentu ladi'ak hasoru nia kónjuje, arguidu ho idade avansadu/avó ona tuir loloos tenke hatudu ezemplu di'ak ba bei-oan sira maibé arguidu hatudu hahalok aat nune'e prokuradór husu ba tribunál atu kondena arguidu ho pena prizaun tinan rua fulan nee no suspende ba tinan tolu.

Entretantu parte defeza husu pena ne'ebé justu tanba arguidu konfesa integralmente ba faktu sira iha akuzasaun, di'ak malu ona ho ofendida, arrepende ninia hahalok no promete sei la halo tan hahalok aat iha futuru.

### **Desizaun**

Depoisde avalia faktu sira hotu, tribunál prova katak faktu sira iha akuzasaun ne'e provadu hotu tuir arguidu no lezada nia deklarasaun konfirmasaun totalmente ba akuzasaun iha audensia julgamentu.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa integralmente, arrepende ninia hahalok no kolabora ho tribunál. nune'e tribunál konklui prosesu ne'e no kondena arguidu ba pena prizaun tinan tolu suspende ba tinan tolu.

## **6. Krime violasaun seksuál ho agravasaun**

Nú. Prosesu	: 0008/19 VQLLT
Kompozisaun Tribunál	: Koletivu
Juis	: Dr. José António d. Escurial, Dra. Sribuana Costa no Dra. Maria Modesta d. A. Viera
Prokuradór	: Dr. Julio da Silva Correia
Defeza	: Dra. Laura Valente Lay
Desizaun	: Pena prizaun tinan 9

Iha 08 Maiu 2024, Tribunál Judisiál Primeira Instánsia Baukau prezide julgamentu leitura akordaun ba krime abuzu seksuál ba ema ne'ebé labela reziste ne'ebé envolve arguidu SS hasoru lezada, iha Munisípiu Vikeke.

### **Akuzasaun Prokuradór**

Iha 23 Jullu 2019, haleu oras tuku 17:30 lokraik, ofendida mesak mak iha nia uma, iha momentu ne'ebá ofendida hamos modo-tahan iha dapur-laran,



derepentí arguidu mai mosu kaer lezada nia liman, hafoin hatete ba lezada katak *“mai ita rua tama ba kuartu laran halo relasaun seksuál lai”* nune’e arguidu rasta lezada ba nia kuartu laran. Bainhira iha kuartu laran, arguidu hahú hasai lezada nia kalsa depois arguidu mós kolu nia kalsa, hafoin arguidu haruka lezada toba sae iha hadak leten. Hafoin arguidu toba sae iha lezada nia leten hodi halo relasaun seksuál ho lezada. Depois halo tiha relasaun seksuál, arguidu sai hosi lezada nia kuartu laran no dada nia kalsa hodi kesi metin nia sintu mak testemuña JM mosu mai haree hetan arguidu, hafoin testemuña husu ba arguidu katak *“maun halo saida iha uma laran?”* maibé arguidu sein fó resposta no ba liu nia uma.

Ofendida moris iha 17 Agostu 2004, nune’e iha loron akontesimentu lezada foin tinan sanulu resin-lima, bazeia ba relatóriu médiku katak lezada sofre moras retraso mentál moderadu desde lezada tinan neen.

Prokuradór akuza arguidu kontra artigu 179 KP kona-ba abuzu seksuál ba ema ne’ebé labele reziste ho moldura penál tinan 4 to’o tinan 12 prizaun.

### **Produsaun ba prova sira**

Iha prosesu julgamentu, arguidu deklara katak iha momentu ne’ebá arguidu ba duni lezada nia uma iha tuku 16:00 lokraik, arguidu atu ba Sr. Dm nia uma mak haree odamatan taka hela no arguidu haree hetan lezada nia aman tuur hela iha nia uma oin, nune’e arguidu mós ba tuur ho lezada nia aman hodi konversa maibé la kleur lezada nia aman dehan atu ba haree karau, nune’e arguidu ho lezada nia aman fahe malu no arguidu ba liu nia uma, arguidu deklara katak lezada moras mentál maibé hatene ko’alia, arguidu la hasoru lezada maibé lezada nia bin JM mak halo modo iha sira nia dapur laran no JM mós la husu arguidu dehan *“ó halo saida iha ne’e”*.

Alende ne’e, lezada konfirma faktu hotu iha akuzasaun no haktuir katak arguidu mak halo relasaun seksuál ho lezada no momentu ne’ebá lezada mesak mak iha uma arguidu bolu ba kuartu laran mak halo relasaun seksuál, nia inan-aman ba hotu toos, nia bin JM ba halimar.

Testemuña JM nu’udar nia bin depoimanta katak koñese arguidu tanba iha momentu ne’ebá arguidu hanesan sira nia xefe aldeia, dala ruma ba testemuña nia uma hasoru testemuña nia aman, iha momentu akontesimentu, testemuña fila hosi halimar tuir dalan kanta to’o uma haree sira nia odamatan taka hela no testemuña hanoin nia aman mak iha laran maibé testemuña haree arguidu mak loke fali odamatan no dada nia kalsa hodi kesi metin nia sintu mak testemuña husu arguidu dehan *“ita mai halo saida iha ne’e”?* maibé arguidu nonook no ba liu nia uma nune’e testemuña bolu fali lezada no husu tuir mak dehan *“katuas sala, dehan na’in rua halo relasaun”* no testemuña fiar lezada tanba lezada nunka bosok.

### **Alegasaun finál**

Prokuradór haktuir katak arguidu nega totalmente ba faktu ne’ebé akuza ba arguidu, maibé lezada konfirma faktu hotu iha akuzasaun katak arguidu mak halo relasaun seksuál no deklarasaun testemuña JM nian iha audénsia julgamentu, tuir relatóriu médiku katak lezada moras mental no halo relasaun

seksuál hasoru lezada, tanba ne'e prokurador la iha duvida husu ba tribunál atu kondena arguidu ho pena prizaun tinan ualu.

Entretantu, defeza haktuir katak haree arguidu nia deklarasaun iha audénsia julgamentu inklui testamuna JM katak haree de'it arguidu sai hosi uma laran maibé la haree arguidu halo relasaun seksuál hasoru lezada, testemuña nu'udar bin sempre liuhosi nia alin/lezada, razaun hirak ne'e husu ba tribunál atu absolve arguidu hosi prosesu ne'e.

### **Desizaun**

Depoisde avalia faktu sira hotu, tribunál halo alterasaun juridíku hosi artigu 172 KP kona-ba violasaun seksuál no artigu 173 alinea c KP kona-ba agravasaun, faktu iha akuzasaun ne'e provadu hotu inklui reforsa hosi testemuña JM nia depoimentu.

Bazeia ba faktu provadu sira ne'e no tetu mós sirkunstánsia atenuante sira hanesan arguidu foin primeiravés mai hatan iha tribunál, nune'e tribunál konklui prosesu ne'e no kondena arguidu ba pena prizaun tinan sia.

### **7. Krime ofensa ba integridade fízika simples ho natureza violénsia doméstika**

Nú. Prosesu	: 0004/22. BCSIC
Kompozisaun Tribunál	: Singulár
Juisa	: Dra. Maria Modesta d. A. Viera
Prokurador	: Dr. Bartolomeu de Araújo
Defeza	: Dr. Grigório M.L. de Lima
Desizaun	: Pena multa US\$30.00

Iha 14 Maiu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu SdC hasoru nia feen, iha Munisípiu Baukau.

### **Akuzasaun Prokurador**

Prokurador akuza katak iha 03 Janeiru 2024, iha oras tuku 19:00 kalan, arguidu tuku dala rua iha lezada nia kotuk, kabun, tuku dala ida iha kabaas parte karuk no uza besi baku dala ida iha liman sikun parte karuk. Antes agresaun ne'e, arguidu ho lezada diskute malu diskusaun koba-ba ofendida atu tuir planeamentu familiar nian.

Prokurador akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa katak faktu iha akuzasaun ne'e loos hotu, deklara taan katak momentu mosu diskusaun arguidu ho kondisaun lanu la kontrola-an hodi halo agresaun hasoru lezada, depoisde akontese di'ak malu ona, arrepende ona ninia hahalok, forma família desde tinan 2008, iha oan na'in lima foin primeiravés baku lezada no arguidu nu'udar motorista ho vensimentu US\$100.00 kada fulan hodi sustenta de'it ba família.

Alende ne'e, lezada konfirma faktu hotu iha akuzasaun, depoisde akontese sira di'ak malu ona, to'o agora arguidu la baku ona lezada.

### **Alegasaun final**

Prokurador haktuir katak faktu akuzasaun prokurador prosedente provadu haree ba arguidu nia deklarasaun no ofendida nia komfirmasaun ba akuzasaun, atu prevene arguidu nia aktu ne'e iha futuru atu labele akontese tan husu ba tribunál atu kondena arguidu ho pena multa.

Entretantu, defeza haktuir katak iha produsaun ba prova arguidu konfesa faktu sein rezerva, arrepende ninia hahalok no foin primeiravés mai hatan iha tribunál, arguidu iha oan nain lima no hanesan motorista vensimentu hodi sustenta de'it ba familia deit la sufisiénte. Tanba ne'e husu ba tribunál atu fó pena ne'ebé evita arguidu nia hahalok iha futuru.

### **Desizaun**

Depoisde avalia faktu sira hotu, tribunál prova katak arguidu tuku dala rua iha lezada nia kotuk, kabun, tuku dala ida iha kabaas parte karuk no uza besi baku dala ida iha liman sikun parte karuk.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

## **8. Krime ofensa ba integridade física simples ho natureza violência doméstica**

Nú. Prosesu	: 0033/22. VQOSU
Kompozisaun Tribunál	: Singulár
Juisa	: Dra. Maria Modesta d. A. Viera
Prokurador	: Dr. Ambrósio Rangel Freitas
Defeza	: Dr. Laura Valente Lay
Desizaun	: Pena multa US\$45.00

Iha 17 Maiu 2024, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade física simples ho natureza VD ne'ebé envolve arguidu NGdC hasoru nia feen, iha Munisípiu Vikeke.

### **Akuzasaun Prokurador**

Prokurador akuza katak iha 22 Agostu 2022, iha oras tuku 08:30 dadeer, arguidu tuku dala haat iha ofendida nia ulun, tebe dala lima iha liman kabun parte karuk, kaer lezada nia fuuk hodi riba ba rai, foti ai-sanak fai ba lezada nia kabaas no foti martelu baku dala ida iha lezada nia ulun. Antes agresaun ne'e, arguidu ho lezada diskute malu kona-ba arguidu uza osan US\$30.00 ba sosa hotu sasam kios nian.

Prokuradór akuza arguidu kontra artigu 145 KP kona-ba ofensa ba integridade fizika simples ho nia moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu deklara katak faktu iha akuzasaun ne'e loos hotu no depoisde akontese liu semana ida rezolve perante família rua, forma família kauze tinan sanulu ona iha oan hamutuk na'in tolu foin primeirvés halo agresaun hasoru lezada, arrepende ninia hahalok no promete iha futuro sei la komete tan krime seluk hasoru lezada no arguidu nu'udar agrikultór rezultadu hodi sustenta de'it ba família.

Alende ne'e, lezada konfirma faktu hotu iha akuzasaun no deklara katak depoisde akontese lezada ho oan sira ba tiha família sira iha Dili, liu semana ida arguidu ho família sira ba tuir hodi rezolve tiha problema ne'e no agora sira hela hamutuk fali ona iha sira nia uma no arguidu la baku ona lezada.

### **Alegasaun finál**

Prokuradór haktuir katak arguidu konfesa integralmente ba faktu hotu, ofendida konfirma akuzasaun no arguidu nia deklarasaun, akuzasaun prokuradór prosedente provadu mezmú di'ak malu ona, nafatin prevene arguidu nia hahalok iha futuro hodi labele hatoman-an rezolve problema ho krime, tanba ne'e husu ba tribunál atu kondena arguidu ho pena multa.

Entretantu, defeza haktuir katak arguidu konfesa faktu hotu iha akuzasaun, di'ak malu ona, arrepende ninia hahalok, promete la baku ona lezada no durante moris hamutuk durante tinan sanulu ona foin primeirvés halo agresaun hasoru lezada. Tanba ne'e husu ba tribunál fó pena admoestasaun ba arguidu hodi fó hanoin ba arguidu katak hahalok ne'ebé arguidu halo ne'e krime.

### **Desizaun**

Depoisde avalia faktu sira hotu, tribunál prova katak arguidu tuku dala haat iha lezada nia ulun, tebe dala lima iha liman kabun parte karuk, kaer lezada nia fuuk hodi riba ba rai, foti ai-sanak fai ba lezada nia kabaas no foti martelu baku dala ida iha lezada nia ulun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada lora durante lora 90. Tribunál mós fiksa pena alternativa durante lora 60 prizaun, bainhira arguidu la kumpri pena multa refere.

## **9. Krime ofensa ba integridade física simples ho natureza violência doméstica**

Nú. Prosesu	: 0044/22. VQOSU
Kompozisaun Tribunál	: Singulár
Juis	: Dr. Yudy Pamukas
Prokuradór	: Dr. Julio da Silva Correia

Defeza : Dr. Sidónio Maria sarmento  
Desizaun : Pena suspensaun fulan 6 suspende ba tinan 1

Iha 21 Maiu 2024, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade física simples ho natureza VD ne'ebé envolve arguidu GdS hasoru nia feen, Munisípiu Vikeke.

### **Akuzasaun Prokuradór**

Prokuradór akuza katak iha 20 Outubru 2022, iha oras tuku 13:00 meiodia, arguidu tebe dala tolu iha lezada nia kotuk laran, uza ai-sanak baku dala ida iha lezada nia ulun. Antes ne'e, arguidu ho lezada diskute malu kona-ba lezada la haree labarik maibé sae motor ba hasai fali foto iha fatin seluk, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklarata katak. Arguidu mós hatutan katak depoisde akontesimentu sira di'ak malu perante família rua, arrepende ninia hahalok, foin primeiravés mai hatan iha tribunál depoisde akontese sira agora hela hamutuk fali ona iha arguidu nia rai no la baku ona lezada to'o agora no arguidu nu'udar agrikultór rezultadu hodi sustenta de'it família.

Alende ne'e, lezada kontinua konfirma faktu hotu iha akuzasaun no deklarata katak depoisde akontesimentu ne'e sira di'ak malu fali no to'o agora arguidu la baku ona lezada.

### **Alegasaun finál**

Prokuradór haktuir katak arguidu konfesa faktu hotu ne'ebé imputa ba nia, lezada mós konfirma akuzasaun atu prevene arguidu nia konduta iha futuru atu labele hatoman-an rezolve problema uma laran ho violénsia, tanba ne'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak iha produsaun ba prova arguidu konfesa faktu ne'ebé imputa ba arguidu, arrepende ninia hahalok, foin primeiravés mai hatan iha tribunál no depoisde akontesimentu ne'e sira di'ak malu fali no to'o agora arguidu mós la baku ona lezada, tanba ne'e husu ba tribunál aplika pena kmaan ba arguidu.

### **Desizaun**

Depoisde avalia faktu sira hotu, tribunál prova katak arguidu tebe dala tolu iha lezada nia kotuk laran, uza ai-sanak baku dala ida iha ulun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona

ho lezada, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

#### **10. Krime abuzu seksuál ba menór**

Nú.Prosesu : 0004/23. BCEVN  
Kompozisaun Tribunál : Koletivu  
Juis : Dra. Maria Modesta d. A. Viera, Dr. José António  
d. Escurial no Dra. Sribuana daCosta  
Prokuradór : Dr. Ambrósio Rangel Freitas  
Defeza : Dr. Grigório M. L. de Lima  
Desizaun : Pena prizaun tinan 15

Iha 21 Maiu 2024, Tribunál Judisiál Primeira Instánsia Baukau prezide julgamentu leitura akordaun ba krime abuzu seksuál ba menór ne'ebé envolve arguidu VX hasoru nia alin rasik ho idade tinan 13 fulan 3, iha Munisípiu Baukau.

#### **Akuzasaun Prokuradór**

Prokuradór akuza katak iha 14 Dezembru 2023, iha oras tuku 21:00 kalan, lezada ba toba iha nia avo nia kuartu laran no nia avo ba toba fali iha hadak iha dapur laran, bainhira lezada toba dukur mak arguidu tama ba kuartu laran hodi toba iha lezada nia kotuk no hasai nia kalsa ho obriga halo relasaun seksuál ho lezada hosi lezada nia kotuk, lezada toba hela hakfodak kuandu nia sente moras no bainhira lezada hader haree arguidu halo hela movimentu, nune'e lezada halai sai hosi kuartu laran ho tanis no ba fó hatene nia avo ne'ebé toba hela iha dapur katak arguidu estraga ona nia. Lezada nia avo hadeer lamas lezada nia orgaun sensitivu depois hasai fali nia liman haree nia liman raan, nune'e fó hatene ba nia oan mane hodi telefone ba Polísia Postu Venilale.

Prokuradór akuza arguidu kontra artigu 177 (1) KP kona-ba abuzu seksuál ba menór ho moldura penál tinan 5 to'o tinan 20 prizaun.

#### **Produsaun ba prova sira**

Iha prosesu julgamentu, arguidu deklara katak faktu iha akuzasaun ne'e loos hotu no deklara tan katak arguidu toba iha kuartu laran mak lezada tama ba kuartu laran toba tuir arguidu iha parte arguidu nia oin.

Alende ne'e, lezada konfirma faktu hotu iha akuzasaun, deklara tan katak lezada hela ho nia inan-aman haki'ak inklui nia avo haki'ak tanba sira nia inan aman moris separa ona, arguidu ba hela ho tiu sira mak dala ruma ba halimar iha sira nia uma, depoisde akontese lezada ba hela iha Uma-Mahon.

Depoisde rona deklarasaun arguidu no lezada nian, prokuradór husu ba tribunál atu presinde tiha depoimentu hosi testemuña ho konsiderasaun katak arguidu konfesa faktu hotu iha akuzasaun no lezada mós konfirma, nune'e prova suficiente ona. Relasiona ho pedidu ne'e, defeza laiha opozisaun. Ho nune'e, tribunál mós presinde tiha testemuña nia depoimentu ka la rona ona testemuña nia depoimentu.

#### **Alegasaun final**

Prokuradór haktuir katak arguidu konfesa faktu hotu kona-ba halo relasaun seksuál ho lezada, arguidu halo relasaun seksuál ne'e ho nia alin rasik, atu prevene arguidu nia konduta iha futuru no fó prevensaun jerál ba ema hotu hodi labele halo tuir arguidu nia hahalok refere, tanba ne'e husu ba tribunál atu kondena arguidu ho pena prizaun tinan sanulu resin lima.

Entretantu, parte defeza haktuir katak, haree ba arguidu nia deklarasaun iha audensia julgamentu hanesan arguidu konfesa, arguidu nu'udar joven bele hadia-an iha futuru, tanba ne'e husu ba tribunál fó pena justu ba arguidu.

### **Desizaun**

Depoizde avalia faktu sira hotu, tribunál prova katak faktu iha akuzasaun ne'e provadu hotu katak arguidu komete abuzu seksuál ba menor hasoru lezada nu'udar nia alin feto rasik mezmu sira la hela hamutuk iha uma ida. Nune'e tribunal halo kualifikasaun juridíku hodi aumenta tan artigu 182 KP (Numeru 1 alinea d) kona-ba agravasaun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, nune'e tribunál konklui prosesu ne'e no kondena arguidu ho pena prizaun tinan sanulu resin lima.

### **11. Krime ofensa ba integridade fízika simples ho natureza violénsia doméstika**

Nú. Prosesu	: 0015/22. BCQLC
Kompozisaun Tribunál	: Singulár
Juis	: Dr. Yudy Pamukas
Prokuradór	: Dr. Ambrósio Rangel Freitas
Defeza	: Dra. Laura Valente Lay
Desizaun	: Pena prizaun tinan 3 suspende ba tinan 4

Iha 22 Maiu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu EAdC hasoru nia feen, iha Munisípiu Baukau.

### **Akuzasaun Prokuradór**

Prokuradór akuza katak iha 26 Dezembru 2022, iha oras tuku 21:00 kalan, arguidu tuku dala rua iha lezada nia hirus matan rezulta lezada monu ba rai, bainhira lezada monu hela iha rai arguidu sama dala rua iha lezada nia hirus matan, hafoin arguidu foti ahu-mama fakar ba lezada nia ibun no inus, bainhira lezada hamrik fali arguidu foti bee jerigen litru 5 nian tuda dala ida iha lezada nia kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu deklarata katak loos mak arguidu tebe dala ida iha lezada nia kotuk laran rezulta lezada monu, maibé arguidu la sama lezada

nia hirus matan, la uza be jerigen litru 5 nian hodi tuda ba lezada no la fakar ahu-mama ba lezada nia ibun no tilun, arrepende ba ninia hahalok, iha oan na'in hitu no agrikultór rezultadu hodi sutenta de'it ba família.

Alende ne'e, lezada konfirma faktu hotu iha akuzasaun, depoisde akontese sira di'ak malu ona no to'o agora arguidu la baku ona lezada.

### **Alegasaun finál**

Prokuradór haktuir katak arguidu konfesa parsial ba faktu, maibé lezada nafatin konfirma akuzasaun, atu prevene arguidu nia hahalok iha futuru hodi labele hatoman-an rezolve problema ho krime. Tanba ne'e husu ba tribunál atu kondena arguidu ho pena prizaun tinan rua suspende ba tinan haat.

Entretantu, defeza haktuir katak arguidu konfesa faktu ne'ebé konstitui ba krime mak tebe dala ida iha ofendida nia kotuk laran, arrepende ninia hahalok no primeiravés mai hatan iha tribunál. Tanba ne'e husu ba tribunál atu aplika pena justu ba arguidu.

### **Desizaun**

Depoisde avalia faktu hotu, tribunál prova katak arguidu tuku dala rua iha ofendida nia hirus matan resulta monu ba rai, bainhira ofendida iha rai arguidu sama dala rua iha ofendida nia hirus matan, arguidu foti ahu-mama fakar ba ofendida nia ibun no inus, bainhira lezada hamrik fali arguidu lori bee jerigen litru 5 nian tuda dala ida iha lezada nia kotuk laran.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu, di'ak malu ona ho lezada, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan haat.

## **12. Krime ofensa ba integridade fízika simples ho natureza violénsia doméstika**

Nú. Prosesu	: 0251/23. BCBCV
Kompozisaun Tribunál	: Singulár
Juisa	: Dra. Sribuana da Costa
Prokuradór	: Dr. Ambrósio Rangel Freitas
Defeza	: Dr. Sidónio Maria Sarmiento
Desizaun	: Pena multa US\$30.00

Iha 22 Maiu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu SCF hasoru nia feen, iha Munisípiu Baukau.

### **Akuzaun Prokuradór**

Prokuradór akuza katak iha 02 Dezembru 2023, iha oras tuku 16:00 lokraik, arguidu tuku dala ida iha lezada nia matan parte loos, basa dala ida iha lezada nia ibun laran no tuku dala ida iha kotuk laran. Antes agresaun ne'e, arguidu ho lezada diskute malu kona-ba lezada kontaktu arguidu atu mai haree sira nia oan hodi lezada fase roupa, nune'e mosu agresaun ne'e.



Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu deklara katak faktu ne'ebé imputa ba arguidu ne'e loos hotu, arguidu hatutan liután katak arguidu fila hosi serbisu kole hela lezada ko'alia barak loos no tolok arguidu ne'e mak arguidu, komete aktu ne'e hasoru lezada. Arguidu deklara liután katak arrepende ninia hahalok no promete iha futuru sei halo tan agresau hasoru lezada.

Alende ne'e, lezada konfirma faktu hotu iha akuzaasun no deklara tan katak Depoide akontese sira di'ak malu no arguidu husu ona deskulpa ba lezada perante família rua.

### **Alegasaun finál**

Prokuradór haktuir katak akuzasaun prokuradór prosedente provadu tanba arguidu konfesa no konfirma mós hosi lezada, mezmú sira di'ak malu ona maibé nafatin atu prevene arguidu nia konduta ne'e iha futuru, husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza husu atu aplika pena kmaan ba arguidu tanba arguidu konfesa integralmente ba faktu no lezada mós konfirma no sira di'ak malu ona no arguidu promote iha futuru sei la halo tan agresau hasoru lezada.

### **Desizaun**

Depoide avalia faktu hotu, tribunál prova katak arguidu tuku dala ida iha lezada nia matan parte loos, basa dala ida ihaibun laran no tuku dala ida iha lezada nia kotuk laran.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

### **13. Krime ofensa ba integridade fízika simples ho natureza violénsia doméstika**

Nú. Prosesu	: 0011/23. LATT
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrósio Rangel Freitas
Defeza	: Dr. Grigório M. L. de Lima
Desizaun	: Pena multa US\$30.00

Iha 22 Maiu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu JL hasoru nia feen, iha Munisípiu Lautein.

### **Akuzasaun Prokuradór**

Prokuradór akuza katak iha 09 Dezembru 2023, iha oras tuku 09:00 dadeer, arguidu tuku dala ida iha lezada nia inus no tuku dala tolu iha lezada nia ulun. Antes agresaun ne'e, arguidu ho lezada diskute malu kona-ba lezada iha relasaun ho mane seluk.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa katak faktu iha akuzasaun ne'e loos hotu, deklara tan katak, arguidu haree lezada nia telefone mak haree mane nia inbox katak "*mai itarua haku'ak malu tan ga?*", arguidu husu tuir lezada no lezada mós rekuñese, nune'e arguidu halo agresaun hasoru lezada, depoisde akontesimentu ne'e sira rezolve ona problema ne'e perante família rua no di'ak malu ona, arrepende ninia hahalok, forma família dezde tinan 2017, iha oan na'in tolu foin primeiravés baku lezada no arguidu nu'udar agrikultór rezultadu hodi sustenta de'it ba família.

Alende ne'e, lezada konfirma faktu hotu iha akuzasaun no rekuñese hahalok ne'e tanba momentu ne'e arguidu mós hela dook, lezada konsege namora ho mane refere, depoisde akontese sira di'ak malu ona perante família no agora sira hela hamutuk ona iha arguidu nia uma.

### **Alegasaun finál**

Prokuradór haktuir katak faktu akuzasaun prokuradór prosedente provadu haree ba arguidu nia deklarasaun no lezada nia konfirmasaun ba akuzasaun, parte prokuradór husu halo atenuasaun extra-ordinariu hodi aplika pena admoestasaun ba arguidu.

Entretantu, defeza haktuir katak bazeia produsuan prova, parte defeza konkorda Prokuradór nia alegasaun.

### **Desizaun**

Depoisde avalia faktu hotu, tribunál prova katak arguidu tuku dala ida iha lezada nia inus no tuku dala tolu iha lezada nia ulun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiravés komete krime hasoru lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

**Atu hetan informasaun liutan favór kontaktu:**

Ana Paula Marçal  
Diretora Ezekutiva JSMP  
Telefone: 3323883/77040735  
Diresaun e-mail: [ana@jsmp.tl](mailto:ana@jsmp.tl)  
[info@jsmp.tl](mailto:info@jsmp.tl)  
Website: <http://jsmp.tl>